

Augustin pretenda trasparenza dals custs

Dumonda parlamentara da deputà Vincent Augustin (pcd Cuira)

DA MARTIN CABALZAR

■ **Damai ch'ils custs ch'il chantun impunda per ils scolars da la scola chantunala a Cuira servan sco referenza per las contribuziuns chantunalas a las scolas medias privatas en las regiuns ha deputà Vincent Augustin (pcd Cuira) pretendi ina megla trasparenza dals custs.** Avant onns figuravan en il quint annual resp. en il budget che la regenza sutmetta al cussegl grond mintgamai cifras detg detagliadas concernent ils custs da la Scola chantunala grischuna. Quai era per render transparenta la calculaziun en favur da las scolas medias privatas. «Las novas directivas per preschentar las prestaziuns ed ils custs en il quint ed en il budget na permettann dentant betg pli al cussegl grond da constatar co ch'ils custs da la scola chantunala sa preschentan effectivamain», crittescha *Vincent Augustin*. Suententer che el n'haja er betg obtegnì l'infurmaziun vulida dal schef da l'uffizi per la furmaziun media-superiura e suenter ch'il secretariat dal departament d'educaziun haja communitgà ch'ils documents detagliads dal budget stettian a disposiziun mo a la cumissiun da gestiun restia ad el nagut auter che pretender il scleriment vülì cun ina dumonda parlamentara.

Basa da calculaziun

En sia resposta infurmescha la regenza che las subvenziuns a las scolas medias privatas vegnian dadas cun ina pauschala per persuna. La calculaziun da questa



Deputà Vincent Augustin ha pretendi trasparenza tar ils custs da la Scola chantunala grischuna che furman la basa per las contribuziuns chantunalas a las scolas medias privatas.

pauschala succedeva sin la basa da l'artitgel 17 da la lescha davart las scolas medias e vegnia encassada cun agid d'in quint maschadà. La pauschala per scolara e scolar sa basia sin las expensas nettas ed effectivas da la Scola chantunala grischuna tenor la contabilitad da las finanzas. Per

quest motiv vegnian ils custs per il mantegniment dals edificis e dals stabiliments resguardads en la calculaziun nova annuala sin fundament da la media dals ultims tschintg onns. Ultra da quai vegnia quintada tier complementamain ina quota d'investiziun che correspundia

a nov pertschient da las expensas da manaschi nettas. Las scolas medias privatas vegnian indemnisadas uschia per ils custs d'investiziun (amortisaziun e tschains da chapital) en moda pauschala. Plinavant vegnia concedida ina pauschala a favur dals custs d'administraziun da 2,5% da las expensas nettas da manaschi.

Nov sistem da budgetar

Dapi il preventiv da 2010 è la Scola media grischuna entrata en la grupp da products 2 «scolas medias» da l'uffizi per la furmaziun media e superiura. Fin ussa vegniva manà en il preventiv ed en il quint da quest uffizi l'indicatur «custs per scolara u per scolar» tenor la contabilitad da manaschi da la Scola chantunala grischuna sco valor da cumparegliaziun. Questa valor è vegnida lantschada cur ch'ins ha repassà la struttura da las gruppas da products e dals effects per ils onns 2013 fin 2016 sco er cura ch'ins ha essenzialisà ils indicaturs a partir dal preventiv 2013.

La regenza conferma che «la cumprova dals custs da las gruppas è vegnida fatga summaricamain e pia senza cumprova individuala dals differents custs calculatorics». Las infurmaziuns detagliadas tar ils custs da la scola chantunala na vegnivian er enfin ussa betg publicadas en il preventiv ed en il quint annual. Tras las simplificaziuns introducidas cun il preventiv 2013 vegnia la cumprova da las gruppas da products fatga da nov sin basa da la contabilitad da las finanzas. Las cifras dal quint dals custs e da las presta-

ziuns n'èn betg pli da vesair ni en il preventiv ni en il quint annual, declera la regenza.

Radund 1200 francs per scolar

La contabilitad da custs e da las prestaziuns che vegnan fatgas intern tras ils uffizis interdisciplinars sa basia per motivs da la praticabladad sin tariffas fitg simplas sco er pauschalisadas ed identicas per tut ils posts da servetsch. Questas valurs possian divergir fermamain dals custs che resultian effectivamain. Ellas na vegnian perquai er betg a furmar ina basa adattada per calcular las pauschalas da las scolas medias.

En il preventiv 2013 èn previds sco basa da calculaziun ils suandants imports: custs da locaziun total 7 595 000 francs u 1140 francs per scolar, la prestaziun da l'uffizi da persunas è inditgada cun 258 francs en total, respectiv 251 francs per scolar, las prestaziuns da l'administraziun cun 219 000 francs u 176 francs/scolar, per prestaziuns da la controlla da finanzas cun total 176 000 francs resp. 142 francs per scolar; la scuntrada interna cun l'uffezi d'informatica munta a 54 000 francs, respectiv 44 francs per scolar; francaturas e lavurs postalas cun total 47 000 francs, respectiv 32 francs per persuna. Las expensas imputablas muntan a totalmain 9 463 890 francs. Repartì sin ils 1237 scolars che frequentan actualmain la scola chantunala munta quai ina pauschala da radund 6785 francs per scolar.